

UNDERTIM

Unidade Nacional Democrática da Resistência Timorese



Maluk kompatriotas povu Timor tomak mak ami hadomi no hakuak. ... Ita nian Nasaun Timor Leste Liberta tiha ona hodi sosa ho ran no ho ruin, maibe ita nian povu seidauk Liberta no hetan Liberdade. ... Povu Timor Leste nia hakarak Desenvolve Timor Leste sai Nasaun ida Desenvolvidu baseia ba Lei no planu tuir povu Timor nia hakarak.

Povu Timor nia hakarak Nasaun Historiku ida ne'e sai hanesan Nasaun ida Desenvolvidu ho identidade Kultural Tradisional maka'as no Ekonomia propiada, Sosiedade ida metin, Seguransa ba ema hotu, Sukus Cidades hetan dalan diak Transportes Elektresidade, Komunikaun nebe propiada. Justisa ba ema hotu iha Lei nia oin, ho tratamentu hanesan, aumenta produktividade setor hotu-hotu, hafolin produitu lokal, hasae Exportasaun, hamenus Importasaun, hasae Enkresiamentu Ekonomia, kria empregu hodi halakon kiak. Maibe realidade Ukun An iha Tinan Lima nia laran hatudu oin seluk, Tamba Ukun Nain sira hamosu politika Sentralismu, Divionismu ho Diskriminativu tan ne'e mak nia konsekuensia halai ba konflitu no hamosu krise bot iha ita nia rai laran. Razaun ida ne'e maka UNDERTIM hamrik hodi netraliza situasaun no problema hirak ne'e hakarak hakuak ema hotu-hotu hodi restaura UNIDADE NASIONAL no hari Estabilidade ho Seguransa diak, hodi kria kondisoens necessáriu atu halao fila fali Desenvolvimentu no Rekonstrusaun Nasional.

CNRT

Congresso Nacional de Reconstrução de Timor-Leste



Tinan 2006, tinan at ida iha ita nia historia, tinan ida atu haluha tiha. Mosu krise ida, tamba Governu ho Parlamento la iha vontade atu resolve problemas kiik hodi sai ba boot. ... At liu tan, membros Partidu iha Governu fahe kilat ba ema civis, hodi halo konflito sai boot tebe-tebes. ... Terus nebé povo liu dala ida tan, tamba Unidade Nacional nakfera tiha hodi fo fatin ba violéncia no destruisaun, sai nudar exigéncia boot ida, muda tiha kultura politika nebé hadook no fahe Timoroan sira.

Tinan hirak ne mos, ita hare pratikas korupsaun, koluzau no nepotismo, nebé estraga Estado no sai hanesan insultu ba povo nia moris. ... Tan ne'e CNRT hamrik atu sai nudar dalan ba inovasaun! Inovasaun katak atu korrije no atu hadia! ... Atu hadia kultura política iha Instituisaun Ukun nian, atu hadia povu nia moris, hodi fo valor ba terus iha funu laran, hodi liberta Rai doben ida ne'e!

Hamutuk ho CNRT ita sei hametin fali Unidade Nacional! Hamutuk ho CNRT ita sei halakon KKN!

Hamutuk ho CNRT ita sei hetan dalan ba desenvolve ita nia Rain!

Ho CNRT, ita Liberta tiha ona ita nia Rain! Ho CNRT, ita sei Liberta duni Povo!

PR

Partidu Republikanu



Uma Lisan Ida Ba Timor Oan Hotu, Nasaun Ida Ho Oportunidade

PROGRAMA:

- Seguransa - Trenu naruk PNTL, Redefini kna'ar F-FDTL ba manutensaun paz, engenaria, ho desastru natural.
- Loke Servisu Husi Dezenvolvimentu – Agrikultura, Infrastrutura, Rural ho Setor Privadu
- Justisa
- Edukasaun - Gratis no obrigatoriu tinan 9.
- Saude - Hatun mate inan ho oan, halakon Malaria iha 2015
- Igualdade Jeneru - Hari Departementu ba Gender ho assuntu minoria, pasa lei violencia domestika

Tetun: Hanesan Lian Oficial No. 1 iha RDTL

PDC

Partido Democrata Cristao



1. PDC hari ho rin Democrasia, Kultura, no Cristao nebe lao ho nia Motto maka: Pas ba hau nia Rain no Moris diak iha Isin no Klamar ba hau nia Povu. PDC sei serbi Rai Timor ho nia Emar sira ho ukun fuan: Maromak, Nacao, Familia, Unidade, Lia Los, Justica, no Kultura nian;

2. PDC maka dalan: Governacao nebe diak, Stabilidade, Desenvolvimento, Moral, Disiplina no Governu unidade Nasional

3. RDTL hari ho difiuldade oin-2, nebe lao ho nia: Kultura/Religiao, Lingua, Suco, Knua ida-idak, Uma Lisan ida-idak, nebe mai husi Timor, nebe haktuir katak, ita ema nia moris iha deminsaun 2 nebe lao hamutuk maka Isin no Klamar. Nunee, PDC fo hatene ba Timor oan sira katak, Timor atu sai diak, so tuir dalan Nacao, Kultura/Religiao nian deit. Nunee mos, moris tuir Democrasia nebe ho regra nebe lao ho Lei Maromak, Nacao, Religiao/Kultura nian, nunee mos objetivo diak ba Stabilidade Politica, Seguranca, Social, no ekonomia ba Nacao;

4. PDC luta: Sistema Presidencial. Halo Timor nia osan rasik hodi hare Nacao laran. Educa Ema hot-2 atu hatene, ida-idak nia Direito, Dever, no Responsabilidade. Nunee mos atu sai ema nebe Kreativo, Produtivo no iha Loyalitas, Nacionalismo no Profesionalismo iha halao Nacao nian.

PDRT

Partido Democrática República de Timor



Objectivo dezenvolvimento sustentavel no permanente iha Timor, prepara zerasaun foun, hakotu odio vingansa malu husi zerasaun - zerasaun. PDRT mos hamrik, vizaun kria sosiedade iha esperito nasionalismo, rekursu humanus, livre husi kiak, beik ho moras. Aumenta produsaun, hadia kualidade, be'e mos, hadia kurikulum escola, hadia facilidades edukasaun, halakon alpabetizasaun, kapasitasaun ba forcas seguransa, politika distribuisaun forcas mak planu dezenvolvimentu ba partido PDRT. Dame ho paz, funu 1974/1975 (Fretilin – UDT), suku tomak istoria funda ho istoria remata, dame ho paz ba funu 1998/1999 (pro outonomia - pro independensia), ho dalan win-win solution no dame no paz ba funu 2006/2007 (Lorosae-Loromonu), lori fila militar Timor oan nebe halai, hasai dadur politica husi kadeia, no bolu fila refujiadus sira husi Kupang ho Atambua mai Timor Leste mak planu politika partido PDRT hodi rezolve krize. Asolica-Osolica moris hori uluk hatutan zerasaun-zerasaun, biti bot, lia nain, tesi lia iha antigo testamentu, lisan fetsaun umane metin, atu ema hatene respeita, domin, no konsiensia katak ema ida deit. Haburas Kultura Timor, halo livro antropologia, lei cultura no hari'i centru kultura. Defende dutrina novo testamentu kristaun katolika, hadomi ema seluk nudar ita an rasik, koperasaun maximu ho misionarista sira iha rai Timor Leste iha dezenvolvimentu saude, edukasaun e moral.

UDT

União Democrática Timorese



UDT primeiro partido iha Timor nia História, nebe mai husi Povo, ho Povo, ba Povo ... Atu servi Povo ho lia los, tuir dalan lo'os atu bele moris iha Democracia ... Atu harii Nasaun hanesa Estado de Direito ida nebe ita moris ho respeito, tolerância, solidariedade tuir direitos humanos fundamentais, UDT sei buka:

Justisa hanesan ba ema hotu no ema hotu tenki hakruuk ba lei • Saúde, hodi bele moris di'ak ho isin di'ak; Assistensia ho apoio ba ema moras • Educasaun ho ensino ba Timor-oan hetan conhecimento atu bele harii Nasaun no fo dignidade ba povo • Informação ho liberdade • Hases-an husi kiak ho atraso • Seguransa sosial atu hadia condisaun ba povo moris diak liu • Asaun sosial ba feto, labarik, katuas ho ferik • Desenvolvimento Económico, Político ho Social • Política Externa atu harii koperasaun ho nasaun seluk • Fo kbiit ba sector privado atu haburas ekonomia, loke campo servisu ba ema hotu • Seguransa ho Defesa Nasional ida nebe fo garantia katak ita lakon tauk ho moris iha dame nia laran.

UDT hakarak halo povo fiar ho lia fuan lo'os, hatudu dalan lo'os

UDT hakarak ita kaer liman hamutuk atu harii ita nia Nasaun!

Atu Hametin Unidade Nasional, Fo Kbiit ba Nasaun, Hodi Haburas Democracia ... "Vota UDT!"



ELEISAUN PARLAMENTAR 30 JUNU 2007

VOTA BA PARTIDU NE'EBÉ ITA HAKARAK

Informasaun hirak ne'e mai husi
partidu politiku no koligasaun sira.

Materiál ne'e imprime ho fundu husi NZAID no USAID.

PD

Partido Democrático



Hari Nasaun Hosi Baze *Partido Democrático nakonu ho jerasaun foun, intelektual no lider rezistencia sira. Sira iha hanoin foun no espirtu boot atu servisu ba Nasaun no Povu Timor-Leste.*

Hamutuk ho Partido Democrático:

Promove politika partisipativu povu tomak hodi "Hari Nasaun hosi Baze" • Hamoris hikas paz no stabilitade iha rai doben Timor-Leste • Hamoris fila fali orgullu ukun rasik an nian • Hametin mentalidade ukun rasik an nian no haburas dignidade povu tomak nudar povu nebe maka ukun rasik an ona • Dezenvolve politika respeita malu, hadomi malu, hanai malu tuir lisan no tradisaun Timor-Leste nian • Implementa politika anti diskriminasaun, klientismu, favoritismu no rejionalismu • Garante justisa ba ema hotu. Ema kiik ka boot, riku ka kiak, hot-hotu hamrik hanesan iha lei nia oin • Dezenvolve moris diak povu nian liu hosi dalan hatun sasan folin, hatun taxa no fo protesau ba produtu lokal • Halakon politika fahe povu ba Lorosae no Loromonu • Konsidera Igreja Katolika ho relijiaun sira seluk nudar parseiru importante governu nian ba dezentvolvimentu nasional • Habelar no haburas demokrasi iha Timor Leste.

PD *Hun Ida, Abut Ida, Povu Ida, Timor-Leste Ida Deit*

PMD

Partidu Milenium Demokratiku



Mensagem Nova Geração husi Partidu Milenium Demokratiku (PMD)

Iha dia 30 de Junhu de 2007, Futuru Rai ida ne'e ita defini dala ida tan

Mai hamutuk ho Partidu Milenium Demokratiku (PMD), nebe Hanesan:

- "Partidu Jerasaun Foun" • "Partidu Paz ho Rekonsiliasaun dalan ba Unidade Nasional"
- "Partidu Lia Los Ho Justica" • "Partidu ba Futuru"

Hodi realiza ba sussesu Elisaun Geral, nebe nakonu ho:

- "Maturidade Politika" • "Kultura Demokratika" • "Honestidade Politika"
- "Vontade no Konsiensia Politika" • "Direitus Sívika nebe Fundamental husi Sidadaun Timor Leste"

Hodi Realiza Elisaun ida ne'e ho Partidu Milenium Demokratiku (PMD) nia Vitoria nebe bele garantia;

"DEMOKRASIA, REKONSILIASAUN, DEZENVOLVIMENTO"

Hanesan Sasukat ba UNIDADE NASIONAL

PST

Partido Socialista de Timor



PROGRAMA GOVERNO POPULAR TRABALHADORES-AGRICULTORES PST BA INDEPENDENCIA 100%, TOTAL NO KOMPLETA:

1. Halakon Disempregu, Loke Kampo de Trabalho! 2. Hapara Inportasaun Hahan Nesecidade Basikú, Hasa'e Produsaun Lokal, Hari Fabrika! 3. Hasa'e Osan 100% ba Funcionario Publikú, F-FDTL, PNTL, Hatun Presu Sasan Nesecidade Basikú! 4. Estabelece Uma ba Povo, Centro Banku Kreditu no Centro Saude iha 13 Distritu 5. Bé Mos no Eletricidade Gratuita ba Povo! 6. Transportasaun Gratuita atu tula Povo nia Produto Agrícola. 7. Subsídio Estado ba: • Estudantes ho tinan 17-21 ho valór 50 U\$; • Inan sira nebé hafoin "tur ahi" iha fulan 3 ho valór 100 U\$; • Katuas-Ferik tinan 50 ba leten ho valór 100 U\$; • Uma kain ida nebé laiha vementu permanente ho valór 100 U\$; • Eis-Kombatentes ho valór 200 U\$. 8. Visa livre ba Estudantes nebé Eskola iha Estrageiros, no subsidió ho valór 50 U\$. 9. Tetum Lingua Ofisial, Bhs Indonésia Lingua do Trabalho! 10. Revoga Lei: • Vitalisia ba Membros PN; • Kode Laboral Trabalhadores (revisaun); • Investimento Estrangeiros (revisaun). 11. Formasaun foun ba F-FDTL no PNTL (Polícia Judiciario iha Ministerio Publikú nia okos) 12. Julga Koruptores, Mafia sistema Judicial, autor nebé Pratiká Vandalismo, Rasismo, Primodialismo no Fasismo Política!

Coligação ASDT/PSD

ASDT – Associação Social Democrata Timorense

PSD – Partido Social Democrata



Fo liman ba empresa kiik sira • Timor oan rasik maka kaer justica • Escola basica obrigatoria • Saude gratis ba ema kbit laek • We mos ba sidadaun hotu • Fo capacidade no promove feto • Reforma ba ferik no katuas idade 60 ba leten • Acesso estrada diak ba mercado • Ami prontu fo sentidu ukun rasik an ba povu Timor tomak liu hosi setor hotu-hotu • Haburas no habelar cultura Timor nudar identidade original povu nian • Ami prontu atu halakon injustica social iha rai laran • Matenek nebe potencial sei uza usa hotu para desenvolve nasaun tuir mehi ukun rasik an • Akuntabilidade publico sei hetan atensaun • Atu aselera dezentvolvimentu sei kria mekanismu planeamentu hosi kraik • Haburas transparencia, halakon kkn • Labarik matenek sei hetan bea siswa • Hafoun sistema agrikultura • Eletricidade iha aldeias hotu • Loke lapangan kerja ba joven sira • Reforma ba ex-pensionista tempo Indonesia nian • Reforma ba funu nain • Industrializasaun ba produtus local • Desentralizasaun sai prioridade atu aselera dezentvolvimentu nacional • Planeamentu partisipativu maka maneira diak atu fo motivasaun ba dezentvolvimento • Sei hatun taxa ba importasaun sembilan bahan pokok • Sei fo subsidió ba café folin wainhira folin tun iha mercado mundial • Subsidiu ba minarai, bandu tesi ai

Aliansa Demokratika

KOTA – Klibur Oan Timor Auwain

PPT – Partido Povo Timor



HANOIN

Hari unidade nasional liu husi valor kultura, hanoin klean, projetu nasional boot bele lori hakmatek i dezentvolvimentu mai povu timor i garante independensia nasional Rai Timor-Lorosae.

Partidu politiku Klibur Oan Timor As'wain – KOTA i partidu politiku Partidu Povu Timor – PPT deside halo koligasaun partidaria eleitoral, objetivu apresentasaun lista unika ba eleisaun Parlamentu Nasional lejislatura 2007-2012, hanaran Aliansa Demokratika – AD ho simbolu uma lisan bandeira metan-mutin-8-1, bandu labele oho labele naok labele bosok, mahon Timor-oan rai-nain foin-sa'e mehi i hadomi paz, estabilidade, seguransa, lia loos, dezentvolvimentu, hakerek historia foun i furak Rai Timor Lorosa'e.

FRETILIN

Frente Revolucionária do Timor-Leste Independente



FORSA LIBERTADORA JUVENTUDI POVU MAUBERE NIAN

FRETILIN 1974, 1999, 2001/2002, 2007, FRETILIN ba futuro, FRETILIN era kompetitiva globalizasaun nian, FRETILIN sékulu XXI, FRETILIN solidária no kombativa. FRETILIN nebé:

- Lori independensia mai Timor-Leste • Hari'i "Estado de Direito Democrático" • Luta ba Demokrasi no respeito ba valor universal hotu direitos umanus nian • Defende no ka'er metin UKUN-RASIK-A'AN • Fó asesu edukasaun no saúdi grátis ba ema hotu • Habelar kober-tura telekomunikasaun, rádiu no televizaun nian • Fó asesu uma diak ba família hotu • Hari'i aldeia iha area rural ho kodisaun hanesan uma sira iha bairru sidadi nian • Fó asesu bé'e mo'os no eletrisidadi ba família sira hotu iha sidadi no zona rural • Kombate analfabetizmu no moris kiak • Hasa'e kualidadi edukasaun no saúdi • Fó garantia ba paz, estabilidade no hametin soberania nasional • Hadiak liu tan estrada, transporte no komunikasaun • Hala'o formasaun professional no kualifikasaun ba bada'en timor oan sira • Hala'o investimentu bo'ot iha setór públiku no privadu, no kria empregu ba timor oan sira hotu.

Pátria ita liberta ona. Mai ita liberta Povu! Vota ba FRETILIN! Vota ba Futuru Timor-Leste nian!

ITA HOTU VOTA BA FRETILIN!

PNT

Partido Nacionalista Timorense



Mensagem husi Presidente Partidu Nasionalista Timorense (PNT), DR Abilio Araújo

BA MALUK DOBEN HOTU IHA TIMOR LESTE

Tuir ita nia sistema politiku Constituissau RDTL lao oras ne daudauk, eleisaun mai ne sei hili ita nia Depu-tadu sira ba Parlamentu Nasional, mos sei deside se mak BELE kaer KNA'AR Ukun hanesan Primeiru Minis-tru foun. ... Nune, ita sei hili ema ne be bele fo confiansa nia hamrik iha ita nia oin, ita sei laran metin HAMUTUK HODI SALVA ITA RAIN husi susar, husi hamlaha, terus husi manobra seluk - seluk ... Ita SEI HILI EMA IDA ATU SAI ITA NIA PRIMEIRU MINISTRU, ema ida ne be bele hatene atu kaer ita nia riku soi iha rai leten no rai okos, iha tasi leten no tasi okos, afoin, ema ida ne be bele halo ita nia Nasaun fila liman atu buras liu tan hodi hari'i ita nia Ekonomia, Sistema Finanseiru makas hodi bele fahe didiak Rendimentu Nasional ba Povo tomak. Nune ita nia Rain sei bele hetan fali Solidariedade, Damen, Justisa Sosial iha ita nia let. ... Partidu Nasionalista Timorense hili ona hau nudar Candidatu PNT nian ba Primeiru Ministru iha eleisaun, 30 Junhu ne. Atu ramata, hau sei dehan tan: HAU SURA HO IMI, IMI BELE SURA HO HAU ATU HAMUTUK ITA HALAO GOVERNO CONVERGENSIA NASIONAL. ATU HABURAS ITA RAIN iha dalan bot ba Dezentvolvimento/Pembangunan. Rai Timor Lorosae nian.

PUN

Partidu Unidade Nacional



HALO ITA NIA VOTU FOLIN VOTA PUN! *Hodi hetan justisa no hadia ita nia ekonomia*

Tempu to'o ona atu tau demokrasi, justisa no dezentvolvimentu iha pratika no reconhece valores demokra-sia kristiana ba ita nia identidade nasional. PUN hamrik atu foti valores demokrasi kristiana iha politika nasaun nian. ... Timor oan prezisa seguransa no paz hodi buka moris. Wainhira laiha justisa, situ-asaun rai laran sei la hakmatek. PUN sei implementa duni justisa hahu 1975 to'o ohin loron hodi foti povu nia direitos humanus. PUN sei reforma F-FDTL no PNTL atu garante forsa seguransa nebe respeita direitos humanus, hakru'uk ba lei no professional. ... Ema nebe iha capacidade no programa diak mak bele kaer Governu hodi serbi povu, gasta orsamentu estadu di-diak, habrani empreza privada no hala'o dezentvolvimentu agrikola atu povu hetan servisu. PUN sei tulun Familia, fo asistencia social ba Veteranus, Faluk, Ferik, Katuas no Oak Kiak sira atu labele hamlaha. ... PUN nia Governu sei mos, sensitivu no nakloke, la iha korupsiun ho nepotismu. PUN fo oportunidade ba timor oan tomak, liliu jovens atu participa iha dezentvolvimentu decentralizadu, atu hetan infraestrutura hanesan rai seluk. PUN sei hatama edukasaun gratis, hadia qualidade edukasaun, sei lori servisu saude besik liu tan ba povu atu halakon povu nia kiak. ... Mai ita hamutuk iha Partidu Unidade Nacional atu realiza ita nia mehi. ... **VOTA PUN!**